

大乘入楞伽經 斷食肉品

唐于闐國三藏沙門實叉難陀奉 制譯



南無本師釋迦牟尼佛

說明

本繁體校正版《大乘入楞伽經斷食肉品》電子書，根據《乾隆大藏經》大乘五大部外重譯經，第 0173 部，唐于闐國三藏沙門實叉難陀奉制譯《大乘入楞伽經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年一月



掃碼關注仁慧草堂微信公眾號

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

淨口業真言

(三編)

唵. 修唎. 修唎. 摩訶修唎. 修修唎. 薩婆訶.

淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

普供養真言

(三編)

唵. 誚誚曩. 三婆嚩. 禡日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇
我今見聞得受持 願解如來真實義

大乘入楞伽經斷食肉品

唐于闐國三藏沙門實叉難陀奉 制譯¹

爾時，大慧菩薩摩訶薩復白佛言：「世尊！願為我說食、不食肉功德過失，我及諸菩薩摩訶薩知其義已，為未來、現在報習所熏食肉眾生而演說之，令捨肉味，求²於法味；於一切眾生起大慈心，更相親愛如一子想，住菩薩地得阿耨多羅三藐三菩提；或二乘地暫時止息，究竟當成無上正覺。世尊！路伽³耶等諸外道輩，起有無見執著斷常，尚有遮禁不聽食肉，何況如來、應、正等覺，大悲含育，世所依怙，而許自他俱食肉耶？善哉！世尊！具大慈悲哀愍世間，等觀眾生猶如一子，願為解說食肉過惡、不食功德，令我及與諸菩薩等，聞已奉行，廣為他說。」

爾時，大慧菩薩重說頌言：

菩薩摩訶薩 志求無上覺
酒肉及與葱 為食為不可⁴
愚夫貪嗜肉 臭穢無名稱

¹ 大正藏：大周于闐國三藏法師實叉難陀奉 勅譯

² 大正藏：求；永樂北藏：求；龍藏：來；校勘：求

³ 大正藏：迦；永樂北藏及龍藏：伽

⁴ 大正藏：食；永樂北藏及龍藏：可

與彼惡獸同 云何而可食
食者有何過 不食有何德
唯⁵願最勝尊 為我具開演

爾時，佛告大慧菩薩摩訶薩言：「大慧，諦聽！諦聽！善思念之。吾當為汝分別解說。大慧，一切諸肉有無量緣，菩薩於中當生悲愍，不應噉食，我今為汝說其少分。大慧，一切眾生從無始來，在生死中輪迴不息，靡不曾作父母、兄弟、男女、眷屬，乃至朋友、親愛、侍使，易生而受鳥獸等身，云何於中取之而食？大慧，菩薩摩訶薩觀諸眾生同於己身，念肉皆從有命中來，云何而食？大慧，諸羅刹等聞我此說尚應斷肉，況樂法人。大慧，菩薩摩訶薩在在生處，觀諸眾生皆是親屬，乃至慈念如一子想，是故不應食一切肉。大慧，衢路市肆諸賣肉人，或將犬、馬、人、牛等肉，為求利故而販鬻之，如是雜穢云何可食？

「大慧，一切諸肉皆是精血污穢所成，求清淨人，云何取食？大慧，食肉之人眾生見之悉皆驚怖，修慈心者云何食肉？大慧，譬如獵師及旃陀羅、捕魚網鳥諸惡人等，狗見驚吠，獸見奔走，

⁵ 大正藏：惟；永樂北藏及龍藏：唯

空飛水陸⁶一切眾生，若有見之咸作是念：『此人氣息猶如羅刹，今來至此必當殺我。』為護命故，悉皆走避。食肉之人亦復如是，是故菩薩為修慈行不應食肉。大慧，夫食肉者，身體臭穢，惡名流布，賢聖善人不用親狎，是故菩薩不應食肉。大慧，夫血肉者，眾仙所棄，群聖不食，是故菩薩不應食肉。大慧，菩薩為護眾生信心，令於佛法不生譏謗，以慈愍故不應食肉。大慧，若我弟子食噉於肉，令諸世人悉懷譏謗，而作是言：『云何沙門修淨行人，棄捨天仙所食之味，猶如惡獸食肉滿腹，遊行世間，令諸眾生悉懷驚怖，壞清淨行失沙門道。』是故當知佛法之中無調伏行，菩薩慈愍為護眾生，不令⁷生於如是之心，不應食肉。大慧，如燒人肉其氣臭穢，與燒餘肉等無差別，云何於中有食不食？是故一切樂清淨者不應食肉。大慧，諸善男子⁸塚間、樹下、阿蘭若處寂靜修行，或住慈心，或持呪術，或求解脫，或趣大乘，以食肉故，一切障礙不得成就，是故菩薩欲利自他不應食肉。大慧，夫食肉者，見其形色則已生於貪滋味心，菩薩慈念一切眾生猶如

⁶ 大正藏：住；永樂北藏及龍藏：陸

⁷ 大正藏：令不；永樂北藏及龍藏：不令

⁸ 大正藏：女；永樂北藏及龍藏：子

己身，云何見之而作食想？是故菩薩不應食肉。大慧，夫食肉者諸天遠離，口氣常臭，睡夢不安，覺已憂悚，夜叉、惡鬼奪其精氣，心多驚怖，食不知足，增長疾病，易生瘡癬，恒被諸蟲之所啖食，不能於食深生厭離。大慧，我常說言：『凡所食噉作子肉想。』餘食尚然，云何而聽弟子食肉？大慧，肉非美好，肉不清淨，生諸罪惡，敗諸功德，諸仙聖人之所棄捨，云何而許弟子食耶？若言許食，此人謗我。

「大慧，淨美食者，應知則是粳米、粟米、大小麥豆、酥⁹油、石蜜，如是等類，此是過去諸佛所許，我所稱說。我種姓¹⁰中諸善男女，心懷淨信，久植善根，於身命財不生貪著，慈愍一切猶如己身，如是之人之所應食，非諸惡習虎狼性者心所愛重。

「大慧，過去有王名師子生，耽著肉味食種種肉，如是不已遂至食人，臣民不堪悉皆離叛，亡失國位受大苦惱。大慧，釋提桓因處天王位，以於過去食肉餘習，變身為鷹而逐於鴿。我時作王名曰尸毗，愍念其鴿，自割身肉以代其命。

⁹ 大正藏：蘇；永樂北藏及龍藏：酥

¹⁰ 大正藏：性；永樂北藏及龍藏：姓

「大慧，帝釋餘習尚惱眾生，況餘無慚常食肉者。當知食肉自惱惱他，是故菩薩不應食肉。大慧，昔有一王乘馬遊獵，馬驚奔逸入於山險，既無歸路又絕人居，有牝師子與同遊處，遂行醜行生諸子息，其最長者名曰班足，後得作王領七億家，食肉餘習非肉不食，初食禽獸後乃至人，所生男女悉是羅刹。轉此身已，復生師子、豺狼、虎豹、鷗鷺等中，欲求人身終不可得，況出生死涅槃之道？

「大慧，夫食肉者有如是等無量過失，斷而不食獲大功德，凡愚不知如是損益，是故我今為汝開演，凡是肉者悉不應食。大慧，凡殺生者多為人食，若人¹¹不食亦無殺事，是故食肉與殺同罪。奇哉世間貪著肉味，人身有肉¹²尚取食之，況於鳥獸有不食者？以貪味故廣設方便，置羅網罟處處安施，水陸飛行皆被殺害，設自不食為貪價直而作是事。

「大慧，世復有人心無慈愍，專行慘暴猶如羅刹，若見眾生其身充盛，便生肉想言此可食。大慧，世無有肉，非是自殺亦非他殺，心不疑殺

¹¹ 大正藏：人若；永樂北藏及龍藏：若人

¹² 大正藏：於人身肉；永樂北藏及龍藏：人身有肉

而可食者，以其¹³義故，我許聲聞食如是肉。大慧，未來之世有愚癡人，於我法中而為出家，妄說毗尼壞亂正法，誹謗於我言聽食肉亦自曾食。大慧，我若聽許聲聞食肉，我則非是住慈心者、修觀行者、行頭陀者、趣大乘者，云何而勸諸善男子及善女人，於諸眾生一子想斷一切肉？大慧，我於諸處說遮十種許三種者，是漸禁斷令其修學；今此經中自死、他殺，凡是肉者一切悉斷。大慧，我不曾許弟子食肉，亦不現許，亦不當許。大慧，凡是肉食，於出家人悉是不淨。

「大慧，若有癡人，謗言如來聽許食肉亦自食者，當知是人惡業所纏，必當永墮不饒益處。大慧，我之所有諸聖弟子，尚不食於凡夫段食，況食血肉不淨之食。大慧，聲聞、緣覺及諸菩薩尚唯¹⁴法食，豈況如來？大慧，如來法身非雜食身。大慧，我已斷除一切煩惱，我已浣滌一切習氣，我已善擇諸心智慧，大悲平等普觀眾生猶如一子。云何而許聲聞弟子食於子肉？何況自食？作是說者無有是處。」

爾時，世尊重說頌言：

¹³ 大正藏：是；永樂北藏及龍藏：其

¹⁴ 大正藏：惟；永樂北藏及龍藏：唯

悉曾為親屬 眾穢所成長
恐怖諸含生 是故不應食
一切肉與葱 韭¹⁵蒜及諸酒
如是不淨物 修行者遠離
亦常離麻油 及諸穿孔床
以彼諸細蟲 於中大驚怖
飲食生放逸 放逸生邪覺
從覺生於貪 是故不應食
邪覺生貪故 心為貪所醉
心醉長愛欲 生死不解脫
為利殺眾生 以財取諸肉
二俱是惡業 死墮叫喚獄
不想不教求 此三種名淨
世無如是肉 食者我訶責
更互相食噉 死墮惡獸中
臭穢而顛¹⁶狂 是故不應食
獵師旃茶¹⁷羅 屠兒羅刹娑
此等種中生 斯皆食肉報
食已無慚愧 生生常顛¹⁸狂
諸佛及菩薩 聲聞所嫌惡

¹⁵ 大正藏：韭；永樂北藏及龍藏：韭

¹⁶ 大正藏：癡；永樂北藏及龍藏：顛

¹⁷ 大正藏：茶；永樂北藏及龍藏：茶

¹⁸ 大正藏：癡；永樂北藏及龍藏：顛

象脇與大雲 涅槃央掘摩
及此楞伽經 我皆制斷肉
先說見聞疑 已斷一切肉
以其惡習故 愚者妄分別
如貪障解脫 肉等亦復然
若有食之者 不能入聖道
未來世眾生 於肉愚癡說
言此淨無罪 佛聽我等食
淨食尚如藥 猶如子肉想
是故修行者 知量而行乞
食肉背解脫 及違聖表相
令眾生怖 是故不應食
安住慈心者 我說常厭離
師子及虎狼 應共同遊止
若於酒肉等 一切皆不食
必生賢聖中 豐財具智慧

大乘入楞伽經斷食肉品

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

補闕圓滿真言

(三編)

唵. 呼嚧呼嚧. 社曳穆契. 莎訶

普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無大乘入楞伽經 (合掌三稱)

南無護法諸天菩薩 (合掌三稱)

禮佛發願文

(一編)

歸命十方調御師 演揚清淨微妙法
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一編)

願以此功德 普及於一切
我等與眾生 皆共成佛道

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；
自皈依僧，當願眾生，統理大眾，一切無礙。和南聖眾。

南无护法韦驮尊天菩萨



此咒置經書中可滅誤跨之罪